

PEMBERITAHUAN PERTANYAAN LISAN
DEWAN RAKYAT MESYUARAT KETIGA, PENGGAL KETIGA,
PARLIMEN YANG KE-13

PERTANYAAN : LISAN
DARIPADA : Y.B. TUAN SIM TONG HIM (KOTA MELAKA)
TARIKH : 20 OKTOBER 2015 (SELASA)
NO. SOALAN : 18

Y.B. TUAN SIM TONG HIM minta Perdana Menteri menyatakan tentang kedudukan “Gagasan Satu Malaysia”:

- a) Adakah ia masih “relevant” memandangkan kebelakangan ini kenyataan Perdana Menteri sendiri lebih mengutamakan satu kaum sahaja; dan
- b) Sila buktikan rakyat berbilang kaum menjadi lebih rapat selepas pelaksanaan “Gagasan Satu Malaysia” ini.

JAWAPAN

Tan Sri Yang Dipertua,

Dasar Gagasan 1Malaysia yang dibawa oleh YAB Perdana Menteri sejak April 2009 sehingga kini adalah bertujuan untuk memupuk persefahaman dan perpaduan secara lebih jitu dan rapat lagi, dengan penekanan dan menyerapkan sikap menerima dan menghormati kepelbagaian masyarakat Malaysia yang majmuk, di samping memantapkan komitmen supaya “Rakyat Didahulukan dan Pencapaian Diutamakan” melalui Program Transformasi Kerajaan dan Program Transformasi Ekonomi untuk semua. Dasar Gagasan 1Malaysia yang di bawa ini secara langsung atau tidak langsung telah berjaya meningkatkan kesedaran dan komitmen rakyat terhadap betapa pentingnya untuk saling menghormati dan mengeratkan perhubungan kaum di negara ini. Sehubungan itu pandangan YB Tuan Sim Tong Him (Kota Melaka) menyatakan Perdana Menteri lebih mengutamakan satu kaum sahaja itu adalah tidak benar dan hanya lebih kepada kenyataan peribadi dan tanpa fakta.

Manakala slogan 1Malaysia telah menjadi keutamaan kepada kerajaan dalam merangka gerak kerja seperti NKRA dan MKRA serta yang terbaru adalah Pelan Transformasi Kerajaan. Projek yang berteraskan 1Malaysia seperti Klinik 1Malaysia dan Tabung Penyelenggaraan 1Malaysia merupakan projek yang akan terus memacu ke arah pendekatan ‘Rakyat Didahulukan, Pencapaian

Diutamakan'. Melalui projek ini, setiap rakyat tanpa mengira kaum dan agama yang memerlukan bantuan akan diberikan perkhidmatan yang terbaik serta murah.

Ini dapat dibuktikan yang mana hingga ke hari ini, setiap warganegara Malaysia keseluruhannya boleh hidup dalam suasana mesra, bersatupadu, bekerjasama dan saling hormat menghormati antara satu dengan yang lain, tanpa mengira kaum, agama dan latar belakang sosio-ekonomi. Mengikut Indeks Ketegangan Masyarakat (IKM) dari tahun 2009 hingga 2014, indeksnya terus menunjukkan kemajuan dari tahun ke tahun berikutnya iaitu daripada 21.6% (2009) kepada 14.1% (2014). Suasana seperti ini membuktikan bahawa perpaduan kaum di Malaysia berada dalam situasi yang amat membanggakan.

Maka, kerajaan melalui Jabatan Perpaduan Negara dan Integrasi Nasional akan sentiasa melaksanakan tugas dan amanah yang dipertanggungjawabkan dengan sebaik mungkin demi keharmonian semua.